

SOL DI PUEBLO

BRIYANDO FUERTE • TRECIENDO CLARIDAD

¡KIA SIN CONTROL!
COMPANIA A
MANDA BUSCA
TUR EQUIPO
DI SCAN NA KIA.
GOBIERNO TIN DEBE
Y NO TA PAGA



DI NO KIER UN MINISTER
PLENIPOTENCIARIO, PA CELEBRACION
GRANDI NA HULANDA



HOH SU SIMAN DI APRECIO 2026 YENA DI INSPIRACION Y EXPLORACION



Siman pasa a tuma lugu na Horacio Oduber Hospital (HOH) su Staff Appreciation Week 2026 unda cu durante un siman

completo ta demostra aprecio y duna balor na tur colega. Anualmente durante luna di mei hunto cu dia di enfermeria ta



celebra Staff Appreciation Week yena di actividad como gesto di aprecio y atencion pa tur cu ta traha na Hospital. Traha den un hospital no ta nada facil y p'esey ta importante pa coleganan gosa hunto y un rato distrae e mente.

Jacco Vroegop, Presidente di Hunta di Directiva, a enfatisa cu e Staff Appreciation Week 2026 tabata un bon oportunidad pa atrobe subraya e rol esencial di tur cu ta traha den hospital. E siman aki ta masha importante pasobra e empleadonan ta esnan cu ta tras di e exito y cuido di HOH. "Mi ta hopi orguyoso di nan y mi ta spera cu Aruba tambe ta orguyoso di nan."

Tema cu a scoge e aña aki ta "Wanderlust" cu ta enfoca riba e deseo pa explora. A habri e siman cu un mensahe virtual di parti di Hunta di Directiva unda a duna danki di curason na

cada empleado di hospital pa tur loke nan ta haci pa e organisacion y nos pashentnan. A cuminsa e mainta cu un dushi desayuno estilo 'grab 'n go' pa habri e siman cu yen di energia. A tene diferente actividad rond di e tema manera un workshop, caminata, 'scavenger hunt' y un competencia entre departamentonan di decoracion y creatividad yama 'wander the world'. Y a scoge dia 12 di mei, esta dia di enfermeria, pa regala cada profesional di HOH un regalito di aprecio. Alabes a pone enfasis riba e importancia di nos coleganan den enfermeria cu tur dia ta na e cama di nos pashentnan. E dia aki tambe den cuadro di sostenibilidad a dedica na e 'one tree initiative' unda coleganan por a haci donacion y alabes planta un mata.

Pues un siman yena di inspiracion recordando un y tur cu tur persona

den Hospital, sin importa bo funcion tin un tarea importante pa nos pashentnan.

Gregory Croeze, Miembro di Hunta di Directiva di HOH, a expresa cu e empleadonan ta e curason di hospital, maske cu tecnologia, innovacion y inteligencia artificial ta keda evoluciona...ta e empleado ta esnan cu tur e amor ta brinda cuido directo na cama.

Pa varios luna e team di colega encarga cu e siman aki a traha duro tras di cortina pa hinca un programa super varia den otro. Di curason un danki na e comision aki cu a uni pa haci e 'Staff Appreciation Week' 2026 di HOH uno exitoso un biaha mas. Y claro un bes mas, danki na nos coleganan cu ta traha 24/7 cu curason pa HOH y nos pashentnan. Danki pa semper t'ey!

KIA SIN CONTROL: COMPANIA A MANDA BUSCA TUR EQUIPO DI SCAN PA DEBE HALTO DI GOBIERNO

ORANJESTAD – Diferente equipo di seguridad y scan a wordo retira awe mainta for di prison KIA, despues cu Gobierno no a cumpli cu pago nan pa varios luna consecutivo.

Segun informacion obteni, un deurwaarder acompaña pa representante legal a yega na KIA pa supervisa retiro di e ekiponan, entre nan sistema di X-ray, walk-through metal detector (WTMD) y detector di cellphone. E equiponan tabata wordo usa diariamente pa screening di bishitantenan y control di seguridad den e prison.

Fuente nan indica cu e compania cu tabata encarga cu huur, servicio y mantencion di e ekiponan a tuma e decision pa retira nan despues gobierno no ta haci pago.

Debi na e situacion, personal di seguridad na KIA lo mester haci controlnan manual y fisicamente te ora cu un otro solucion wordo



implementa. Esaki por causa retraso grandi pa bishitantenan, kende posiblemente lo mester warda mas tempo promer cu nan

por pasa e proceso di control y drenta e institucion.

E situacion ta genera preocupacion

tocante seguridad y e maneho di compromiso di Gobierno.

E pregunta grandi ta: ki intencion gobierno tin?

CONFERENCIA NACIONAL: “GENERATION SWAP” – INTERCAMBIO DI GENERACION

En coneccion cu celebracion di 40 aña di existencia di Asociacion Trabou di Hubentud Aruba (ATHA) ta organisa e conferencia nacional “Generation Swap”. E conferencia aki ta un colaboracion entre ATHA, Directie Ouderenzaken, Vereniging Scouting Aruba, Club Kibrahacha 60+, Believe in Yourself Parlamento Hubenil.

Conferencia Nacional
E conferencia nacional: Generation

Swap lo tuma lugar riba diasabra 23 di mei 2026 for di 9:30 di mainta te cu 2:30 di atardi den e aula di EPB Hato. Un dia yena di baile, musica, arte y coneccion entre generacion. Entrada ta completamente gratis y ta inclui un almuerzo.

E conferencia aki lo ta uno interactivo den cual ta encurasha e participacion di tanto hoben como adulto mayor. Durante di e conferencia lo ilustra en corto e resultadonan di e workshops, lo presenta un obra di teatro, lo



tin grupo di baile di hoben y adulto mayor y tambe e conferencia lo wordo clausura cu bon musica. Na final di conferencia por pasa tambe na diferente booth na unda por haya mas informacion di e workshops cu a wordo teni. Ta invita hoben y adulto mayor pa bini hunto y participa na e Conferencia Nacional: “Generation Swap”- Intercambio di generacion.

NoticiadiCorte

GOBIERNO MESTER DEBOLBE TUR E STEPANAN NA E COMPANIANAN



ORANJESTAD – Awe mainta Hues di Corte di Husticia den Promer Instancia a dicta sentencia den e caso sumario cu e companianan di huur step electronico den e sector hotelero: E-Bike y Green Bike a cuminsa contra Gobierno. Esaki ta relaciona cu e decision di Minister di Husticia pa kita tur e stepnan for di caminda ya cu esakinan ta forma un peligro pa trafico y esnan cu ta riba e step.

SOLO DI PUEBLO por a compronde cu Hues a muestra Gobierno cu mester actua a base di ley y cu e forma con a actua no ta corecto.

SENTENCIA

Hues den su sentencia ta muestra cu dia 21 di April 2026, e Minister di Husticia a anuncia cu, di inmediato, ta prohibi pa uza e stepnan electronico riba caminda publico. Riba 29 di April 2026, un “Ultimo Aviso” di e Minister a

wordo publica riba social media y riba 30 di April 2026, Gobierno a manda kita e stepnan electronico.

E companianan E-Bike y Green Bike den Corte a pidi Hues pa prohibi Gobierno confisca e stepnan electronico.

Gobierno no ta di acuerdo cu esey y a presenta un contra demanda caminda ta pidi pa e companianan kita tur e stepnan electronico y e stacionnan di carga for di propiedadnan di Gobierno.

MESTER ACTUA A BASE DI LEY

Hues su decision den e caso sumario aki ta cu, na e momento aki, Gobierno no por kita e stepnan electronico.

Hues a muestra cu si Gobierno kier tuma medida contra e stepnan

electronico, esey mester sosode cuidadosamente y segun e forma stipula den ley. Den e caso aki, esey ta nifica cu Gobierno mester manda un carta na e companianan, unda Gobierno ta anuncia cu (y dicon) segun Gobierno e companianan ta actuando contra ley. Gobierno mester specifica di cual ley ta trata, cual medidanan e companianan mester tuma. Ademá Gobierno mester stipula un periodo cu e companianan mester haci esey.

Hues a remarca cu Gobierno no a haci nada di esaki den e caso aki.

NO POR KITA STEPANAN Y STACIONAN DI CARGA

Hues a sigui bisa cu Corte ta dicidi cu e companianan di huur e stepnan electronico, na e momento aki no ta obliga pa kita e stepnan y e stacionnan di carga for di caminda publico.

Hues ta muestra cu aki tambe ta conta cu Gobierno mester prome

manda un carta na e companianan cu e peticion pa nan kita nan propiedadnan for di tereno di Gobierno y esaki dentro di un tempo razonabel.

COMPANIANAN MESTER ATENE NA REGLANAN VIGENTE

Hues ta muestra cu e decision aki no ta nifica cu e stepnan electronico por keda pa semper riba caminda publico.

Hues ta muestra cu naturalmente e companianan cu ta huur e stepnan electronico, mester atene nan mes na e reglanan vigente.

Esey ta conta tambe pa e conductornan di e stepnan.

Hues ta muestra cu e sentencia ta nifica cu Gobierno no por yega actua, kita stepnan electronico, mientras cu Gobierno mes no ta sigui e reglanan stipula den ley.

Clasificados










SOLODIPUEBLO@GMAIL.COM

CEL. 585 9500



PARLAMENTARIO EDGARD VROLIJK: DI NO KIER UN MINISTER PLENIPOTENCIARIO, PA CELEBRACION GRANDI NA HULANDA

Nos por a tuma nota cu no un, sino tres Minister, esta Minister Mike Eman, Minister Gerlien Croes y Minister Geoffrey Wever, ta na Hulanda pa e instalacion di e Minister Plenipotenciario, Mildred Schwengle.

Locual ta resalta mas ta cu e tres ministernan aki no a biaha nan so; nan a ser acompaña pa famia, un grupo grandi di coordinador y prensa, resultando den gastonan cu ta surpasa 250.000 florin pa bay haci un fiesta.

Di NO mester, pa celebracion

Esaki ta contra di locual a ser manifesta den pasado. Tabata apenas un par di luna pasa cu Minister Gerlien Croes a declara cu Aruba no tin mester di un Minister Plenipotenciario, pasobra esaki ta un gasto demasiado halto pa nos pais.

Den e mesun publicacion ey, e Minister a presenta e cifranan di e Minister Plenipotenciario anterior pa hustifica cu Aruba no tin mester di un representacion asina, afirmando cu e mes lo a biaha tur luna pa Hulanda pa cubri e trabou.

Y kico a pasa awor? Awe, e mesun Minister aki ta di fiesta na Hulanda, cu un glas di champagne den man, malgastando placa di pais Aruba pa bay

celebra e instalacion di e Minister Plenipotenciario. Con pueblo por kere den e palabra di e Minister aki, ora su propio actonan ta kita tur balor y credibilidad for di dje.

Bebe champagne y pueblo ta sufri

E decision di Mike Eman, Geoffrey Wever y Gerlien Croes pa malgasta mas di 250.000 florin na un biahe acompaña pa famia, coordinadornan y prensa, ta un golpi duro na momento cu dia pa dia pueblo ta ser asota pa e costo di bida asina halto.

E realidad ta cu, e mandatarionan aki por organisa fiesta riba custia di pueblo, bebe champagne caro y come caviar, mientras cu e ciudadano comun tin cu lucha diariamente pa wak con e por pone pan na mesa pa su yiuinan.

Esaki ta e abuso cu abo como ciudadano ta bibando na man di un grupo cu, sin escrupulo, ta malgasta bo placa y kier gaña bo wowo, mientras nan ta pasa dushi riba bo custia y riba esun di bo famia.

Cos a bolter pa fiesta y mas fiesta, mientras abo tin di traha duro pa yena caha di pai Aruba pa Minister Mike Eman, Geoffrey Wever y Gerlien Croes sigui biaha y gosa, y abo ta come inflacion di Geoffrey Wever.





VACATURE

BIJ COLEGIO EPI



Draag bij aan de toekomst. Inspireer de volgende generatie!

De Minister van Koninkrijksrelaties, Onderwijs, Jeugd, Innovatie en Sport, als bevoegd gezag van de Dienst Publieke Scholen, nodigt enthousiaste professionals uit om te solliciteren op onderstaande functie bij Colegio Profesional Intermedio (EPI).

Instructietaal Nederlands

Docent Elektrotechniek - 2VB

Docent Bouwkunde - 1VB

Wat breng je mee?
Vereisten:

- Minimaal 2^e graads onderwijsbevoegdheid of gelijkwaardig diploma met aantoonbare praktijkervaring;
- Uitstekende beheersing van de instructietaal (Nederlands);
- Praktijkervaring in het bedrijfsleven is een pré bij beroepsgerichte vakken;
- Je stelt de student altijd centraal.

Jouw profiel:

- Professionele werkhouding en verantwoordelijkheidsgevoel;
- Sterke didactische vaardigheden en pedagogisch inzicht;
- Samenwerking- en communicatieve vaardigheden;
- Flexibel en open voor innovatie binnen het beroepsonderwijs;
- Ervaren met digitale leermiddelen en technologie.

Wat bieden we jou?
 Een uitdagende omgeving binnen het beroepsonderwijs, waarin je bijdraagt aan de ontwikkeling van jonge professionals. De arbeidsvoorwaarden zijn conform het Landsbesluit Bezoldiging Onderwijspersoneel, de Landsverordening Materieel Ambtenarenrecht en de Landsverordening Vakantie en Vrijstelling van Dienst Ambtenaren.

Geïnteresseerd?
 Stuur je sollicitatiebrief, voorzien van een CV en kopieën van diploma's, **binnen 2 weken** na het verschijnen van deze vacature naar: ✉ sollicitatie@dps.aw met een cc naar hr@epiaruba.com t.a.v. Het Bevoegd Gezag - Minister van Koninkrijksrelaties, Onderwijs, Jeugd, Innovatie en Sport, d.t.k.v. Managementteam Dienst Publieke Scholen, J.F.K. Education Center, Stadionweg 37.

Vragen?
 Voor meer informatie kun je contact opnemen met de HR-afdeling van Colegio EPI:
 ☎ + (297) 525 8726 / 746 ✉ hr@epiaruba.com

PROGRAMA PISKECHI LO INICIA OFICIALMENTE

Oranjestad - Minister di
Finansa, Asunto
Economico y Sector
Primario, mr.

Geoffrey Wever, ta anuncia
cu Programa Piskechi lo
inicia oficialmente
diasabra 20 di juni!
Pa sigui fortalece e
comunidad di pesca,
Gabinete AVP-Futuro a
renoba pier di Savaneta
(ex-Brisas) y actualmente
e destaho publico pa e
pier na Rodger's Beach ta
habri. Minister Wever a
indica cu ta importante pa
e cultura aki keda biba den
e generacionnan cu ta
sigui nos.

Aportando na e Sector
Primario, ta un obhetivo
clave pa Minister Wever,
y cu e motivacion aki, a
lansa, cu e sosten di su
colega Minister
Croes; Programa Piskechi.
Programa Piskechi tin
como meta pa nos siña e

futuro generacion e curso
tradicional di pesca na
man. E programa lo lanza
oficialmente su cu prome
les, 20 di juni.

"Como Minister di Sector
Primario, e ta un honor pa
por lanza e programa aki
hunto cu mi colega
Minister Croes, pa
hobennan por bin hunto
y conecta na un elemento
asina importante pa e
Sector Primario, y
pa Aruba" e mandatario a
indica.

Piscamento ta parti di nos
identidad Arubano, y nos
tin e deber di sigui inverti den
futuro, sin lubida di unda
nos ta bin. Minister Wever
ta pidi mayornan pa keda
pendiente, door cu otro siman e link
di registracion ta bai live,
y lo por inscribi bo yiu



Minister di Finansa, Asunto Economico,
Sector Primario
mr. Geoffrey Wever

**Minister di Sector Primario
ta anuncia cu:**

**Desde otro siman, mayornan por inscribi nan yiu
hoben entre 10 cu 17 aña pa siña nos dushi
cultura di pesca na man!**

**PROGRAMA
PISKECHI**

**Keda pendiente pa e
link di registracion cu
lo sali otro siman!**

**Programa Piskechi su prome
les ta 20 di juni!**

M.J.C TROMP NOTARIS

Santa Cruz 35 • Santa Cruz, Aruba
☎ +297 585 3500 | +297 585 7900
✉ info@notaristromp.com

Op **donderdag 4 juni 2026** des namiddag om 14.00 uur, zal in de vergaderzaal van de "Aruba Surfside Marina", L.G. Smith Boulevard 7, Oranjestad, Aruba, ten overstaan van notaris mr M.J.C. Tromp of haar plaatsvervanger, de executoriale verkoop, als bedoeld in artikel 3:268 van het Burgerlijk Wetboek van Aruba, bij opbod en daarop volgende afmijning worden gehouden van:

- het recht van erfpacht tot 19 november 2051 op een perceel domeingrond, groot 646 m2, gelegen te Mabon in het Vierde District van Aruba, (kadastrale indeling: 4-E-22), nader omschreven in **kadastrale meetbrief nummer 82 van vier juli negentienhonderd een en negentig**, met het daarop gebouwde, plaatselijk bekend als **"Mabon 9-F"**.

Inzetsprijs: Afl. 277.000, ==;

De veilcondities zullen 8 dagen voor de verkoopdatum ter inzage liggen ten kantore van voornoemde notaris.

De executant behoudt zich het recht voor, de veiling uit te stellen en op te houden zonder de verplichting de reden(en) daartoe te noemen.

Bieders dienen terstond een bankgarantie of een gelijkwaardige document dat aanvaardbaar is voor de executant, te overleggen en in het bezit te zijn van een geldig identiteitsbewijs.

Notariskantoor mr M.J.C. Tromp

Santa Cruz 35

Tel: 5853500/5857900

Whatsapp: (297) 6997245

Fax: 5854222

Email: veiling@notaristromp.com / auction@notaristromp.com

Visit: Arubanotary.com



Clasificados

SOLODIPUEBLO@GMAIL.COM
CEL.585 9500

SOLO Di Pueblo

Drs. Shailiny Tromp-Lee:

DIVERSIDAD CULTURAL NA ARUBA MESTER WORDO COMPAÑA PA HUSTICIA SOCIAL, OPORTUNIDAD HUSTO Y RESPET MUTUO

Ayera mundo henter, incluyendo Aruba, a conmemora Dia Mundial di Diversidad Cultural pa Dialogo y Desaroyo, un iniciativa di UNESCO cu ta resalta e valor di inclusion y cohesion social.

Parlamentario Drs. Shailiny Tromp-Lee (Fraccion MEP) ta subraya cu pa Aruba, un isla caminda mas cu 100 nacionalidad ta biba y traha hunto, e dia aki tin un esencia hopi profundo, pero e ta bini tambe cu un gran responsabilidad. “Nos mester sinti nos mes orguyoso cu Aruba structuralmente ta un ehempel bibo den Caribe di con diferente cultura, idioma y tradicion por convivi na un manera pacifico,” Tromp-Lee a declara. E parlamentario ta splica cu e mescla cultural aki no solamente ta enrikece nos identidad como pueblo, sino cu e ta e motor tras di nos forsa laboral y nos pilar economico principal, cu ta turismo.

Esfuerso continuo pa un berdadero inclusion Sinembargo, mientras nos ta celebra nos gastronomia varia, nos multilingualismo y nos herencia multicultural, e Parlamentario ta recorda nos riba e advertencia cu expertonan di UNESCO ta haci structuralmente:

diversidad so no ta suficiente. “Pa un berdadero inclusion existi, e sociedad mester wordo construi riba fundeshi di igualdad social y oportunidadnan husto pa tur hende,” Tromp-Lee a enfatisa.

Den e contexto aki, e mandatario ta resalta cu e debate no mester keda solamente na e parti superficial di e celebracion, sino hiba e discusion un paso mas leu. Esaki ta encera percura pa e forsa laboral multicultural cu ta sostene nos economia nan derechonan laboral ta keda cumpli cu nan, cu nan ta keda protehi y keda trata husto, y cu nos sistemanan di educacion ta fomenta un bida social formativo pa nos hobennan.

Proteha nos identidad Tromp-Lee ta conclui expresando cu e meta principal mester ta semper pa mantene un balansa caminda nos ta habri pa



mundo, compartiendo cu respet mutuo, mientras nos ta salvaguardia y duna balor na nos propio identidad Arubiano. “E diversidad cu ta caracteriza nos, mester ta structuralmente un fuente di fortaleza cu ta uni nos, no un motibo pa division. Ban sigui traha hunto pa un Aruba caminda cohesion social, husticia y respet ta central den cada aspect di bida,” e Parlamentario a finalisa bisando.

Pa mas informacion, por fabor bishita e pagina oficial di Facebook: Shailiny 'Shai' Tromp-Lee

AUMENTO DI BIENTO TA TRECE MAS STOF Y MAS KEHONAN DI ALERGIA



Proteha bo salud.
Tuma precaucion.



NISTERMENTO
FRECUENTE



WOWO IRITA
Y TA BASHA AWA



NANISHI
CERA



DIFICULTAD
PA HALA ROSEA

Bo Salud, nos prioridad!

Zona di Desperdicio na Barcadera ta habri 1 di juni 2026

A.T.A.:UN PASO CONCRETO PA UN ARUBA MAS LIMPI Y SOSTENIBEL



Dia 20 di mei, Aruba Tourism Authority (A.T.A.), hunto cu Ecotech y den colaboracion cu Ministerio di Turismo, Transporte y Labor, conhuntamente cu Ministerio di Asuntonan General, Cultura, Medio Ambiente y Naturalesa, a firma oficialmente e acuerdo pa e prome Zona di Desperdicio na Barcadera. Cu e firmamento di e acuerdo aki, e partnernan a confirma nan compromiso pa crea un sistema mas organisa, accesibel y sostenibel, caminda residentenan por deposita desperdicio di un manera responsabel y contribui activamente na un Aruba mas limpi.

E iniciativa ta financia pa medio di A.T.A., asina continuando na sigura cu entrada genera door di turismo ta wordo

inverti directamente den proyectonan cu ta beneficia tanto comunidad como medio ambiente y nos turismo.

Aruba Limpi: di conscientisacion pa accion real

Como parti di e campaña Aruba Limpi, A.T.A. no ta solamente crea conscientisacion pa mantene Aruba Limpi, pero ta enfoca tambe riba cambio di comportacion. E campaña aki lo core paralelo cu e introduccion di Zona di Desperdicio, creando conscientisacion, pero tambe dunando informacion na nos comunidad riba e uzo corecto di e facilidad, pero tambe riba e importancia di separacion corecto di desperdicio y formacion di habitonan responsabel den maneho di desperdicio.

Cu e introduccion di Zona di Desperdicio na Barcadera, residentenan lo tin acceso directo y practico pa deposita desperdicio di un manera responsabel. E iniciativa aki ta contribui na reduccion di dump ilegal y acumulacion di desperdicio, mientras cu ta fortalece sentido di responsabilidad comparti den comunidadnan. Pa A.T.A., un medio ambiente limpi no ta solamente crucial pa nos imagen como destinacion, pero e ta un inversion directo den sostenibilidad di nos producto turistico y bienestar di nos comunidad. Cu esaki, Aruba ta drenta un siguiente paso concreto pa sigura un futuro duradero pa nos isla.

Compromiso continuo di A.T.A. pa mantene Aruba limpi

Aruba ta wordo reconoci pa e hecho cu e ta limpi, y un isla limpi ta bisa hopi di su comunidad. A pesar di esaki, A.T.A.

y tur partner involvi ta consciente cu mas accion ta necesario. Durante añanan, A.T.A. a sigui pone enfoca riba e topico di limpieza, implementando y sosteniendo diferente iniciativanan. Rond di nos playanan, A.T.A. a pone bari di sushi cu diferente compartimentonan pa facilita e separacion di desperdicio, caminda Metabolic Foundation ta encarga cu e recogemento pa por recicla.

Ademas, A.T.A. ta activamente fortalece limpieza di playa pa medio di colaboracion cu Varadero N.V., cu ta provee limpieza mecanisa cu ekipo specialisa pa kita desperdicio manera glas, plastic y otro material cu por keda atras bou di e santo blanco y cu metodo tradicional no semper por kita eficientemente. E iniciativa aki ta complementa e limpieza manual y ta contribui tanto na seguridad di bishitante y comunidad, como na proteccion di nos medio

ambiente. Durante añanan, A.T.A. a conduci limpieza den varios areanan di nos awanan tambe, por ehempel na Palm Beach a haci limpieza pa reduci beach sludge/lodo, esaki den colaboracion cu autoridadnan concerni.

Otro esfuersonan enfoca riba limpieza ta inclui iniciativanan manera "Baki den Bario," cual a ricibi sosten di A.T.A. na november y december di 2025. Tur e accionnan aki ta refleha un compromiso duradero pa contribui na un medio ambiente limpi y un comunidad, pero tambe bishitantenan mas consciente.

A.T.A. ta invita tur residente pa haci uzo di e Zona di Desperdicio na Barcadera cuminsando dia 1 di juni 2026. Tur informacion relevante tocante uzo, orario di servicio y guia lo ta disponibel riba pagina oficial di social media di Aruba Limpi.

DNM TA LANSA SECCION FLORA Y FAUNA DATABASE RIBA NAN WEBSITE DI TUR E ESPECIENAN PROTEHA NA ARUBA



ORANJESTAD - Directie Natuur en Milieu (DNM) ta uni na e celebracion mundial di Dia Internacional di Biodiversidad (IDB) 2026. E aña aki, e celebracion tin un nificacion extra special pa nos isla, mirando cu DNM ta lansa oficialmente e Flora y Fauna Database riba nan website e Lista di Especie Proteha Local, cu ta inclui tur e sortonan proteha pa nos ley local. E Flora y Fauna Database di Aruba ta un iniciativa di DNM pa comparti informacion tocante mata y bestianan local. E ta yuda habitantenan, studentenan, investigadores y amantenan di naturalesa

siña mas, identifica sortonan y proteha e biodiversidad unico di Aruba.

E Dia Internacional di Biodiversidad ta wordo celebra tur aña riba 22 di mei pa recorda cu a adopta e Convenio riba Diversidad Biologico (CBD) na 1992, y pa eleva conscientisacion riba e importancia di biodiversidad pa bienestar humano y desaroyo sostenibel. Pa aña 2026, Nacionnan Uni a stipula e tema: "Actua local pa un impacto global" ("Acting locally for global impact"). E tema aki ta enfatisa e rol crucial cu iniciativanan local tin pa alcanza e metanan global



di biodiversidad.

Pa Aruba, no tin miho forma pa duna contenido na e lema aki cu door di formalisa y publica e lista di nos propio tesoronan natural. Door di salbuardia nos matanan y bestia local y unico, Aruba ta aporta directamente na e Kunming-Montreal Biodiversity Framework (KMGBF), un areglo internacional cu tin como meta pa frena e perdida di biodiversidad pa aña 2030. Accion Local, Impacto Global Aruba su biodiversidad ta rico pero vulnerabel. Proteccion di nos flora y fauna local ta esencial no solamente pa naturalesa mes, sino tambe pa seguridad di cuminda, un ecosistema marino sano, awa limpi, regula di clima, y pa e estabilidad economico di nos isla.

E tema di e aña aki ta recorda nos cu pa logra metanan na nivel mundial, nos mester cuminsa den nos mesun cas, riba nos mesun pida baranca. Cu e lansamento di e database flora y fauna riba e website dnm-aruba.org, DNM ta duna comunidad en general informacion valioso den su idioma oficial Papiamentu di cua sortonan ta protegi. Cada mata local cu nos planta, cada cas di shoco cu nos respeta y e rifnan di coral y e bida marino cu nos conserva, nos ta haciendo un acto local cu tin un impacto positivo riba henter e planeta.

Den cuadro di e celebracion aki, DNM a activa nan plataforma di informacion; C a m p a ñ a Digital: Compartiendo informacion riba e diferente especie di flora y fauna cu ta aparece riba e lista Landsbesluit bescherming inheemse

flora en fauna via plataforma social.

• **M a t e r i a l Educativo:** Ofreciendo recurso pa scolnan pa asina e hobennan por siña reconoce y balora nos especienan proteha. DNM ta haci un yamada na henter e pueblo di Aruba cu naturalesa ta e fundeshi di nos bida y nos economia. Ban actua local awe pa garantisar un futuro sostenibel pa e generacionnan cu ta bini. DNM ta gradici tur NGO, organisacionan y fotografonan cu a colabora cu informacion y potret pa asina yega na e producto final. Pa mas informacion tocante e Lista di Especie Proteha y con abo por contribui, bishita e pagina di Facebook di Directie Natuur en Milieu (DNM) @dnmaruba of tuma contacto via email info@dnm-aruba.org

ARUBA TA FORTALECE COOPERACION INTERNACIONAL PA PROTECCION DI NATURALES Y DESARROYO SOSTENIBEL



Prome Minister Mike Eman a reuni cu minister di clima y medio ambiente di Hulanda, Stientje van Veldhoven. Den cuadro di su bishita oficial na Den Haag, Prome Minister mr. Mike Eman a reuni awe cu Minister di Clima y Medio Ambiente (Klimaat en Groene Groei) di Hulanda, Stientje van Veldhoven. E tabata un

dialogo extenso tocante e retonan y oportunidadnan grandi cu tin riba area di medio ambiente, sostenibilidad y proteccion di naturalesa. Durante e encuentro, a dialoga riba e balans cu paisnan manera Aruba mester logra entre desaroyo economico y proteccion di naturalesa. Prome Minister

Mike Eman a enfatisa cu Aruba ta conscientemente buscando un modelo di crecimiento cu ta crea prosperidad, pero cu na mes momento ta respeta e "grens ecologico" di naturalesa. "Desaroyo economico ta necesario pa crea prosperidad y estabilidad pa nos pueblo, pero proteccion di nos naturalesa ta igual di

importante. Nos tin cu busca harmonia entre e dos aspecto aki," Prome Minister Mike Eman a expresa despues di e reunion.

Den e contexto aki, Prome Minister a comparti cu minister Van Veldhoven diferente iniciativa concreto cu Aruba ta desplegando actualmente, incluyendo e cooperacion structural cu Wageningen University & Research (WUR). Segun Prome Minister Eman, Aruba ta beneficia enormemente di e conocimiento cientifico y experticio internacional cu e instituto ta aporta riba tema manera biodiversidad, manejo di naturalesa y sostenibilidad. Entre e proyectonan menciona durante e reunion tabata e plan reforestacion di nos isla cu mas di 100.000 mata, cu ta captando atencion internacional, y tambe e desaroyo di rif artificial y restauracion di coral basa riba investigacion cientifico. Prome Minister Mike Eman a destaca cu e proyecto di coral, cu a cuminsa algun aña pasa, awor ta muestra resultado positivo y concreto. "Tur isla den Caribe ta enfrenta e peligro di perde su coral y rifnan. Si bo perde coral y rif, bo ta perde un ciclo biologico completo. E ta afecta pesca, nos beachan, manglo y finalmente e balans natural completo di nos isla," e Prome Minister a declara.

Segun Prome Minister Mike Eman, e cooperacion cu instituto manera WUR ta habri porta pa Aruba bira un centro di conocimiento y innovacion den region, unda investigacion cientifico y aplicacion practico por bai man den man. Un otro tema importante cu a discuti tabata e manejo sostenibel di naturalesa den Aruba, incluyendo e "goat exclusion zones" pa proteha area natural vulnerabel. Den esaki, Prome Minister a enfatisa cu Gobierno di Aruba ta buscando solucion cu ta respeta tanto e naturalesa como tambe elemento cultural y historico di Aruba. "Cabriton ta forma parti di nos identidad y cultura. Ora bo mira un pintura antiguo di Aruba, semper bo ta mira mata di divi-divi, cunucu y tambe nos cabritonan. Nos kier recupera nos naturalesa, pero den un forma cu tambe ta respeta ken nos ta como pueblo," Prome Minister Mike Eman a expresa.

E reunion cu minister Stientje van Veldhoven ta forma parti di e esfuerso continuo di Gabinete AVP-Futuro pa fortalece cooperacion internacional riba area di sostenibilidad, innovacion y proteccion di naturalesa, cu meta di crea un Aruba mas fuerte y sostenibel pa futuro.

Clasificados





SOLODIPUEBLO@GMAIL.COM
CEL. 585 9500


MINISTER DOWERS A RICIBI DIRECTIVA NOBO DI SINDICATO DI POLIS SPA



Diahuebs atardi, Minister di Husticia, Transporte Publico, Integracion y Energia, mr. drs. Arthur Dowers, a ricibi den su oficina e presidente nobo di Sindicato di Polis SPA, Lito Lacle, hunto cu comisario di SPA Alex Wernet, den cuadro di un encuentro di introduccion.

Durante e reunion, a intercambia pensamento tocante e importancia di mantene comunicacion habri entre Minister di Husticia y representantenan di cuerpo policial, cu enfoke riba bienestar di

polis, fortalecimiento di e organisacion y seguridad pa comunidad.

Minister Dowers a felicita e directiva nobo cu nan eleccion y a desea nan hopi exito den e responsabilidad importante cu nan a asumi. Minister di Husticia Dowers ta kere den bon colaboracion basa riba respet mutuo.

Ademas ta para pa comunicacion habri, cual ta fundamental pa sigui fortifica cuerpo policial y garantiza un Aruba mas sigur, cu mas estabilidad y mas confiansa den comunidad.

Durante audiencia cu Prome Minister di Hulanda Rob Jetten PROME MINISTER MIKE EMAN: STABILIDAD Y PROGRESO COMUN CENTRAL DEN DIALOGO ENTRE ARUBA Y HULANDA



Prome Minister Mike Eman ta destaca importancia di unidad y continuidad den un mundo cu hopi turbulencia. Diahuebs tardi na Den Haag, Prome Minister mr. Mike Eman a reuni cu Prome Minister di Hulanda, Rob Jetten, den cuadro di fortalece e dialogo continuo entre Aruba y Hulanda tocante diferente tema strategico pa futuro di Aruba y Reino Hulandes. Durante e encuentro, a dialoga tocante diferente proyecto cu Aruba y Hulanda ta desaroyando hunto,

incluyendo e progreso riba e tema di e EU preclearance y tambe e Memorandum of Understanding (MoU) cu Wageningen University & Research (WUR). Segun Prome Minister Eman, e cooperacionnan aki ta habri caminda pa innovacion, desaroyo economico y sostenibilidad pa Aruba. "Nos a delibera awe tocante diferente siguimiento di varios desaroyo cu nos a construi hunto cu Aruba. E tema di e EU preclearance y e cooperacion cu WUR ta ofrece hopi oportunidad pa

futuro di nos isla," Prome Minister Mike Eman a declara despues di e reunion. Tambe a dedica atencion n'e proximo Conferencia di Reino, caminda diferente paisnan di Reino lo reuni pa dialoga riba varios interesnan comun y futuro di cooperacion den Reino. Den e contexto aki, Aruba a pone enfasis riba diferente tema internacional y strategico cu ta relevante pa posicion di Reino den un mundo moderno.

Segun Prome Minister Mike Eman, e reunion cu Prome Minister Rob Jetten tabata caracteriza pa cordialidad, habri y respet mutuo. "E recepcion caluroso aki na oficina di Prome Minister Jetten tabata cu un sentido di cordialidad y respeto mutuo loke nos aprecia enormemente. Nos ta sigui duna forma n'e palabranan y e visionnan pa futuro di Reino," Eman a comenta. Prome Minister Mike Eman a enfatisa cu den e circunstancianan mundial actual, estabilidad y



cooperacion dentro di Reino ta di importancia esencial. "Nos ta biba den un epoca di hopi turbulencia den mundo. Mas cu nunca, ta importante pa nos tin un relacion solido den Reino. No tin luga pa discordia of bay den direccion cu ta crea friccion. Nos mester di estabilidad," Eman a expresa.

Segun e Prome Minister, e estabilidad y continuidad di Reino ta fundamental pa garantiza seguridad, progreso y bienestar pa nos comunidatnan y den tur parti di Reino. "Pa nos gabinete, e estabilidad y

continuidad di Reino ta esencial. Nos ta inverti den amistad, cooperacion y continuidad pa nos isla den cada barrio y cada caya por mira e beneficio y e frutanan di e cooperacion aki," Prome Minister Mike Eman a

**PUEBLO A HAÑA SU
PEN BEK**

Pa kualkier informacion
solodipueblo@gmail.com
or
585-9500

DIA INTERNACIONAL PA DIVERSIDAD BIOLOGICO

Ora diversidad biologico, of biodiversidad pa corto, tin un problema, humanidad tin un problema.

Diversidad biologico frecuentemente ta ser comprendi den termino di e variedad amplio di especie vegetal, animal y micro-organismo, pero tambe ta inclui e diferencianan den cada especie mes, por ehempel e variacionan den cultivo y animal di cria, y e variedad di ecosistema (lago, bosque, desierto, paisahe nan agricola) cu ta alberga multiple tipo di interaccion entre nan especienan presente (humano, mata, animal, micro-organismo).

Recursonan di diversidad biologico ta e pilarnan riba cual nos ta construi civilizacionan. Pisca ta provee 20% di tur proteina animal pa mas o menos 3 biyon hende. Mas cu 80% di e dieta di ser humano ta consisti di producto deriva di planta (cultivo). Casi 80% di hende bibando den areanan rural den paisnan den desaroyo ta depende di medicina tradicional deriva di planta y hierba pa nan cuidio medico basico. Pero perdida di biodiversidad ta menasa nos tur, incluso nos salud. A ser comproba cu perdida di biodiversidad por causa un expansion di zoonoses, malesanan transmiti di animal pa ser humano, mientras cu di otro banda, si nos mantiene biodiversidad intacto, esaki ta ofrece herment excelente pa lucha contra pandemianan manera causa pa coronavirus.

Naciones Uni a proclama 22 di mei como Dia Internacional pa Diversidad Biologico pa aumenta e comprension di y concientisacion pa temanan di diversidad biologico.

E TEMA PA 2026: ACCION LOCAL PA UN IMPACTO GLOBAL

Ora comunidad global ser yama pa re-examina nos relacion cu mundo natural, un cos ta resalta: apesar di tur avance tecnologico, nos ta sigui depende di ecosistema vibrante y saludabel pa necesidadnan esencial, manera awa potabel, alimento, medicina, pa traha paña, refugio, energia etc.

Pesey ta importante respeta, restora y proteha biodiversidad

Na December 2022, Nacionan Uni a adopta e Kunming-Montreal Global Biodiversity Framework (Plan di Biodiversidad). E plan ambicioso aki ta establece 23 meta pa 2030 y 4 obhetivo mundial pa 2050 pa preveni y reverti perdida di biodiversidad.

Entre e obhetivonan: restora 30% di ecosistemanan degrada, conserva 30% di tera, awa riba tera y laman, reduci na 50% e introduccion di especie invasor y moviliza USD 200 biyon pa aña pa biodiversidad, tur pa 2030.

E aña aki Dia Internacional pa Diversidad Biologico, tin como tema "Acting locally for global impact", esta "Accion Local pa Un Impacto Global", y ta pone un idea poderoso central: cambianan mayor ta cuminsa localmente riba un escala chikito. E exito di e plan global pa reverti perdida di biodiversidad ta depende di forza di accion local- compromiso di comunidad, organisacionan y gobierno trahando hunto.

E campaña aki tambe ta destaca e sentido di urgencia. Na 2026, ta keda solamente 4 aña pa cumpli cu tur meta di e Global Biodiversity Framework fha pa 2030 y Obhetivonan di Desaroyo Sostenibel (SDGs).

Nos mester actua AWOR!

MENSAHE DI ANTONIO GUTERRES, SECRETARIO GENERAL NACIONAN UNI Biodiversidad ta e red bibiente cu ta sostiene humanidad.

Sin embargo chaos climatico, polucion y e incesante explotacion di tera, laman y awa dushi ta pushando nos mundo natural pa un colapso total, cu consecuencia devastador pa ser humano, su porvenir y subsistencia y desaroyo sostenibel.

E Kunming-Montreal Global Biodiversity Framework ta muestra e caminda pa sigui. Pero mester accelera e ritmo cu ambicion y responsabilidad. Gobernnonan mester tuma e iniciativa pa accelera e implementacion, mobilisa financiamento y remedia deficiencia den capacidad cu ta frenando e progreso.

Pero e tema di 2026 ta subraya cu exito ta depende no solamente di accion di gobierno. Pueblonan indigena, comunidnan local, hende muher y hubentud, mundo academico, empresanan, ciudadnan y regionan tur tin un papel vital pa hunga den proteha y restora naturaleza.

Nacionan Uni ta sostiene tur Estado Miembro cu medida inclusivo cu fundamento cientifico, actualizando strategianan nacional di biodiversidad (NBSAPs), ampliando areanan proteha, restorando ecosistemanan y integrando naturaleza den planificacion pa

desaroyo sostenibel y e accion climatico.

Riba Dia Internacional pa Diversidad Biologico 2026, ban apoya esnan actuando localmente pa impacto global y colabora pa para y reverti perdida di biodiversidad, pa hende y naturaleza prospera hunto.

SITUACION DI BIODIVERSIDAD NA ARUBA

Na 2009 Rainbow Warriors Core Foundation a acerca Secretariado di e Convenio pa Diversidad Biologico na Montreal pa por haci un prefeasibility study pa e instrumento conoci como National Biodiversity Strategy and Action Plan. A logra haña lus berde di Ministerio di Asuntonan Exterior di Holanda y na 2010 e Secretariado a asigna e actual director di dicho Secretariado na Montreal, esta David Cooper, como liaison. Pero e desmantelacion di Antiyas a imposibilita acceso na datos di e cinco isla y un actitud di algun oficial di gobierno no colaborativo cu e proyecto cu tawata conta cu aprobacion di gobierno holandes y colaboracion di Nacionan Uni a pone cu e proyecto no por a ser conclui.

Na 2024 Rainbow Warriors Core Foundation a participa na e 4th UN Conference on SIDS na Antigua y na 2025 a participa den e 3rd UN Ocean Conference na Nice, Francia.

Na e Conferencia COP12 di e Protocol Concerning Specially Protected Areas and Wildlife (SPA) in the Wider Caribbean Region, teni na Aruba na October 2023 na Aruba, Rainbow Warriors Core Foundation como participante observador a haci un intervencion enfatisando e valor di citizen science y open data pa sostiene tomo di decision pa e SPAW Protocol. A propone proyecto piloto usando data satelital y di sensor, alinecu cu e Blue Carbon framework pa aumenta monitoreo di mangel y ecosistema en general.

A subraya e necesidad pa integra inteligencia artificial (AI) pa mehora analisis di data y predictive monitoring, cu a l esfuertonan lo cuadra cu e Decada di Nacionan Uni di Ciencia

Oceanico pa Desaroyo Sostenibel y e Decada pa Restoracion di Ecosistema, local lo promove uso di ciencia habri, participacion comunitario y conservacion di biodiversidad.

Rainbow Warriors Core Foundation ta participa den 4 community groups dedica na inteligencia artificial cu e obhetivo specifico pa crea standard pa AI pa desaroyo sostenibel. E Community Groups ta parti di e World Wide Web Consortium, un organisacion crea pa e inventor di e World Wide Web, Tim Berners-Lee. E organisacion aki ta crea standards pa uso riba web mediante Working Groups y Community Groups.

Awor nos por anuncia cu orguyo cu nos ta den preparacion pa introduci un programa di desaroyo di digital twins hustamente den e marco di e tema di Dia Internacional pa Biodiversidad Biologico pa accion local den forma di colaboracion entre stakeholder aplicando citizen science y ciencia aplica en general.

Y lo conta cu colaboracion cu islanan den Caribe, Pacifico Sur, institutonan cientifico y docenas di NGOs perteneciendo na rednan di colaboracion internacional tanto den biodiversidad marino, terrestre, pero tambe di instancianan internacional den ramo di telecomunicacion y inteligenica artificial.

Por menciona especificamente e programa BioDT (pa tera y biodiversidad general) y EUDITO (European Union Digital Twin for the Ocean).

Nos participacion den ambos conferencia a crea contactonan valioso pa colaboracion y Rainbow Warriors Core Foundation a logra e promer piedra pa e fundeshi di ciencia y tecnologia colaborativo den marco di e Kunming-Montreal Global Biodiversity Framework pa comunidad henter di Aruba por participa den Accion Local pa Impacto Global y cu colaboracion cu otro isla.



GOBIERNO TA HABRI CAMINDA NOBO PA CONOCIMIENTO Y SOSTENIBILIDAD DEN REGION



Na Wageningen Prome Minister Mike Eman ta enfatisa balor di crea un economia di conocimiento y proteccion di naturalesa pa futuro di Aruba

Hopi entusiasmo na Hulanda pa cooperacion entre Wageningen University & Research cu Aruba

Durante e bishita oficial di delegacion di Aruba diahuebs mainta na Wageningen University & Research (WUR), e director general nobo di Environmental Sciences Group, André van Lammeren, a expresa gran entusiasmo tocante e posibilidad pa fortalece cooperacion structural entre Aruba y Wageningen. Den encuentro cu Prome Minister mr. Mike Eman, a dialoga riba e oportunidadnan pa amplia investigacion científico, innovacion y aplicacion practico di conocimiento den area manera naturalesa, biodiversidad, agricultura y sostenibilidad.

Prome Minister Mike Eman a comparti entusiasmo tocante e siguimento cu ta duna na e Memorandum of Understanding (MoU) firma recientemente entre Aruba y WUR, cu meta pa explora e posibilidad di establece un presencia academico y científico di WUR na Aruba.

Segun Prome Minister Mike Eman, e bishita a confirma e interes mutuo pa fortalece cooperacion den diferente area strategico relevante pa Aruba su futuro sostenibel. "Pa nos tabata hopi importantepa hasi un siguimento riba e MoU cu nos a firma cu Wageningen Aruba den presencia di Minister-president Rob Jetten algun siman pasa. Nos ta mira cu tin entusiasmo grandi di parti di e directiva di WUR

pa Aruba," Prome Minister Eman a declara.

Segun e Prome Minister, colaboracion cu Wageningen University & Research por yuda Aruba desaroya un vision a largo plazo pa crecimiento economico den balans cu proteccion di naturalesa y sostenibilidad ambiental. E tambe a referi na diferente iniciativa local cu ya ta muestra resultado positivo, incluyendo proyectonan di restauracion di coral y innovacion ambiental. "Tur experiencia cu nos tin na Aruba y cu ta resulta exitoso, por bira un producto pa exporta. Proyecto di coral, por ehempel, ta muestra resultado impresionante. Tur dia nos ta mira e coralnan creciendo, y e proyecto ta bira un ehempel



y cu nan ta mira e oportunidadnan concreto den Aruba y den nos region," segun Prome Minister Mike Eman. Durante e encuentro, a dialoga riba diferente sector caminda Wageningen University & Research (WUR) por aporta conocimiento y innovacion, manera den agricultura, manejo di naturalesa, proteccion di ecologia, seguridad di alimento y desaroyo sostenibel. Prome Minister Mike Eman a enfatisa cu Aruba tin e oportunidad pa posiciona su mes como un centro di conocimiento den Caribe y Sur America, haciendo bon uzo di e reputacion internacional cu WUR ta brinda. "WUR ta reconocí mundialmente pa nan conocimiento den agricultura, den proteccion di naturalesa y den recuperacion di ecologia. Awe nos a mira cu WUR ta entre e universidadnan mas prestigioso den mundo. Si nos logra stablece un sucursal di WUR Aruba, nos lo trece un nombre grandi, hopi conocimiento y oportunidad nobo

importante di con Aruba por combina innovacion, naturalesa y desaroyo sostenibel," Prome Minister Mike Eman a indica.

Na su turno André van Lammeren, director general nobo di Environmental Sciences Group na WUR ta admira e potencial cu nos isla por brinda e region. "Tin hopi entusiasmo pa sigui explora huntu con nos por haci esaki bira realidad. E entusiasmo cu nos ta mira tanto na Prome Minister Mike Eman como tambe na WUR ta realmente inspirador," André van Lammeren a expresa. Segun Van Lammeren, e vision ta bay mucho mas leu di solamente educacion academico. E ta enfoca tambe riba aplicacion practico di conocimiento y investigacion pa logra impacto concreto den comunidad y den medio ambiente. "E no ta trata solamente di conocimiento y estudio fundamental. E ta trata tambe di con nos ta aplica e

conocemento y estudionan realisa en practica pa realmente mira cambio y resultado concreto," el a comenta.

Durante e reunion, un di e tema principal tabata e proyectonan di restauracion di coral cu WUR y Aruba ta desaroyando huntu. "Nos ta mira actualmente con nos por mehora e coralrifnan. Nos a haci experimento hopi exitoso pa laga e coralnan crece bek. Pa nos esey ta hopi importante, pasobra nos ta siña con e proceso ta funciona y nos ta mira e resultado den practica," Van Lammeren a splica. E director di Environmental Sciences Group a enfatisa tambe cu e vision di Prome Minister Mike Eman tocante balansa entre economia y proteccion di naturalesa ta totalmente den liña cu e filosofia di WUR. "Mi ta contento cu e tema di balansa entre economia y e ambiente unda nos tur ta biba ta ocupa un lugar importante den agenda. Bo no por laga desaroyo economico bay na costo di naturalesa ni biodiversidad. E balans ey ta esencial," el a declara. Segun Van Lammeren, a pesar cu Wageningen ya tin mas di dies aña colaborando cu Aruba den diferente proyecto, e posibilidad di un establecimiento permanente na Aruba lo marca un paso historico den e cooperacion. "En realidad, nos ta presente na Aruba pa hopi aña caba. Nos a traha huntu cu e profesionalnan di Aruba den diferente proyecto. Pero un presencia permanente lo ta un "milestone" hopi importante. Nos ta apenas na cuminsamento di e trayecto, pero naturalmente nos kier mas asina lihe posibel," Van Lammeren a indica.

Gobierno di Aruba ta continua trahando pa posiciona Aruba como un centro regional di innovacion, sostenibilidad y economia di conocimiento, aprovechando colaboracion strategico cu institucionan internacional di alto prestigio manera Wageningen University & Research.



NO CONSULTA CU E BRUHONAN BISTI DEN CUERO DI CARNE

Tin bruhonan cu ta promove nan servicionan den medionan di comunicacion. E bruhonan ta ofrece bo tur sorto di judansanan, di drecha tur bo problemanan, sanacionnan, suerte etc. y hopidin tabin cu diferente titulonnan y nombrenan bao di un capa pa ganja hopi hendenan. No bai na e bruhonan, pasobra unabes cu bo bai, bo ta entrega bo mes na e bruhonan y cu nan demonionan. Esaki ta un pika mortal y condenabel den bista di Dios. Pakiko tin algun hendenan conciente di Dios Su boluntad y tog nan ta bai na e bruhonan? Bosonan no ta comprende, cu boso no por ta cu Dios y alaves cu satanas tambe. Den Bijbel Deuteronomio 18: 10-12; Dios Tata ta bisa: "Cu lo no haya meimei di bo, cu ta laga pasa su yiu homber of su yiu muher pasa pa sacrificio di candela; cu lo no tin lesadornan di futuro, ningun hende cu ta consulta cu e astronan (horoscoptonan), ni cu e bruhonan, cu no haya ningun hende cu ta consulta cu e spiritistanan, cu mediumnan, cu no haya ningun hende cu ta adivina (tarot) of na esnan cu ta jama e mortonan (montamento). Pasobra Dios Yave ta aborece na esnan cu ta haci e cosnan aki y precisamente E ta expulsanan for di Su bista." Den Bijbel Leviticonan 20: 6, Dios Tata ta bisa:

"Si algun di boso cu ta consulta na e spiritistanan y na e adivinonan pa uni cu nan diosnan falso, lo Mi bira Mi cara contra nan y lo Mi eliminanan den nan pueblo." Esnan cu ta bai na e bruhonan, e diabelnan ta keda nan tras, nan lo sinti hopi movecionnan stranjo rond di nan, nan lo tende stemnan y hopi bes nan ta wordo posei pa e diabelnan, nan no por drumi anochi y nan no por controla nan mes etc.. Y door di esey e bruhonan ta sigi manda diabelnan pa nan. Hopi di e hendenan aki, cu ta wordo posei pa e diabelnan, nan ta bai para te na e clinica di PAAZ, pa tratamento di psychotic, schizofrenie, dimencia etc.. Hendenan sin fe, ta laganan cai den e sorto di servicionan diabolico aki, na unda cu e bruhonan ta monta pa baha e spiritonan diabolico y nan ta usa bo portret y bo fecha di nacemento den nan ritualnan etc.. Bo fe den Dios ta bisa'bo, pa no bai na e sorto di camindanan robes aki, pero bai na un pastoor of bai na un persona Cristian y hopi spiritual pa e por juda bo y pa e duna bo un bon conseho y spiertamento di e sorto di e hendenan aki. Ora bo tende y lesa di e sorto di servicionan di e bruhonan aki, no core jama y no core bai di biaha, pero pensa prome y bai busca bo informacionnan

na un persona spiritual di Iglesia, pa bo no cai den e tranpanan di e diabel y pa bo no ofende Dios cu bo pikanan condenabel. Na esnan cu ta pensa di bai of cu a bai caba na e bruhonan, den Bijbel 1 Cor. 10: 21-22, Cristo-Hesus ta adverti: "Bosonan no por bebe for di e copa di Senjor y den mesun tempo ta bebe for di e copa di e demonionan. Bosonan no por participa

na e Cena di Senjor y tambe di e demonionan. Acaso boso kier provoca e rabia di Senjor? Of acaso boso ta mas fuerte cu'E?" Akinan Cristo-Hesus ta adverti, bo no por ta pretende di ta un Cristian y alaves bo ta bai na e bruhonan. Bo no por ta stima Cristo-Hesus y alaves bo ta bai na e bruhonan. Den Bijbel Levitico 19:26, Dios Tata ta bisa bon kla: "No mete boso mes den bruherianan."


Dios ta bisa bon cla den Bijbel, 2 Tessalonicensenan 1: 8 y 9; "Den candela ardiente pa castiga esnan cu no ta reconoce Dios y na esnan cu no ta obedece na Evangelio di nos Senjor Hesus. Nan lo paga pa esey cu perdicion eterno lew for di Cara di Senjor y di Su Mahestad di Su Forsa."

Seferino Tromp
Mensahero di Dios



PLUS GROUP
ACCOUNTANTS | ACCOUNTING | TAX & PAYROLL

Gerencia y personal di Plus Group ta anuncia fayecimento di



Sra. Clara Marina Werleman-Kock
Mihor Conoco como "Rina"

Querida mama di nos colega Sra. Lindell Croes- Werleman y suegra di nos directeur Sr. Anthony Croes

Nos ta extende nos mas sincero condolencia na Lindell, Anthony y demas famia den e momentonan dificil aki.

Cu Sra. Clara Marina Werleman-Kock sosega na Paz.

**UN BITTER
DI MAS...**

**FOR
STROBA
BO DI
YEGA CAS.**

